

2 Timoteo

Esaki ta e último karta (di e bukinan den Tèstament Nobo) ku Pablo a skirbi i na mes tempu ta su karta mas personal, yen di amor pa ku su yu spiritual, Timoteo. Pablo tabata grandi i tabata sigur ku pronto su tempu na mundu lo yega na su fin. E karta tabata pa su kolega i amigo intimo, revelando su deseonan final. El a skirbi e karta aki for di prizon—probabelmente un profos friu i skur na Roma.

Kiko a sosodé pa Pablo yega na un situashon asina? Skritura no ta divulge esei. Ma e ta duna algun indikashon.

Den Romanonan 15:28, Pablo a laga e kristiannan di siudat di Roma sa ku e lo bishitá nan ora e ta na kaminda pa Spaña. Skritura no ta indiká si Pablo a logra yega na Spaña. Ma Clemente di Roma a skirbi na aña A.D. 95 ku Pablo "...a siña rektitut na henter mundu, i ora el a yega e límite pabou el a duna su testimonio dilanti mandatarionan..." Si Clemente tabata skirbi for di Roma, sigur lo tabata straño pa e yama Roma "e límite pabou". Clemente no a menshoná Spaña, ma talbes e tabata referí na e pais ei. Pues, ta spekulashon so si Pablo a logra bishitá Spaña.

Ma 2 Timoteo ta duna indikashon di algun di su otro biahenan. Ta parse ku el a bishitá Korintio atrobe i a laga Erasto ei (4:20). Tambe Pablo tabata na Mileto i a laga Trófimo na ayanan pa e por rekuperá di un enfermedat (4:20). Klaramente Pablo tambe a bishitá Troas un tempu, pasobra el a laga algun di su pertinensianan ei (4:13). Nos no sa kua di e sitionan ei el a bishitá promé i kua despues.

I. OKASHON PA E BUKI

Kiko tabata Pablo su sirkumstansia ora el a skirbi su di dos karta na Timoteo?

E buki di Echunan ta klousurá ku Pablo enkarselá na Roma wardando su rat. Segun tradishon, Pablo a haña su libertat despues di esei i a kontinuá ku su ministerio mishonero, mas òf ménos na aña A.D. 62. Nos ya kaba a nota loke nos por dedusí tokante Pablo su historia despues di e buki di Echunan. (Por haña mas informashon den e estudio tokante e *Kartanan Pastoral i 1 Timoteo*.)

Ma tres aña despues di wòrdu hañá inosente i pues a haña su libertat, Pablo atrobe a wòrdu arestá i enkarselá na Roma. Un kandela a destruí mitar di Roma dia 19 di yüli, A.D. 64. Hopi hende tabata di opinion ku Emperador Nero (A.D. 54-68), un hòmbler kruel i loko, intenshonalmente a laga sende e kandela. Probabelmente e hendenan tabatin rason. Ma pa deskitá e akusashonnan ku el a sende e kandela, el a akusá kristiannan di e e krímen aki i a deklará kristianismo ilegal. Anto el a inisiá persekushon kontra kristiannan—loke a kontinuá durante e restu di su reino. Tabata durante e persekushon aki ku Pablo a wòrdu enkarselá pa di

dos biaha na Roma. Talbes Emperador Nero, sabiendo ku Pablo tabata un lider di kristiannan, a busk'é spesial pa arest'é.

Ta deskonosí kiko tabata e sirkunstansianan ku a inisiá su enkarselashon. Pablo a skirbi den 4:14, “*Alejandro, e plate, a tratami hopi malu*”. Kisas Alejandro tabata e motibu ku Pablo a hañ'é dilanti “*mesa bèrdè*”. Si e Alejandro aki ta e mésun persona mensioná den Echunan 19:33-34 i 1 Timoteo 1:20, ta pusibel ku Alejandro tabata un plate hudiu ku a biba na Efeso. E tabata kontra Pablo su siñansa ku paganonan por wòrdu salvá dor di e gracia di Dios. Talbes e tabata instruí kristiannan pa warda lei. Pablo a pon'é bou di disiplina. Talbes den su rabia, el a denunciá Pablo i a informá soldánan romano unda nan por hañ'é. Kisas esei tabata motibu ku Pablo a wòrdu arestá.

Skritura no ta indiká nada tokante e momentu ku Pablo a wòrdu arestá e biaha aki. Pusibelmente esaki a tuma lugá na Troas. Si e romanonan a arestá Pablo diripiente na Troas i a hib'é mes ora na Roma, esei lo splika dikun e mester a laga su mantel, bukinan i pèrkamèntunan na e stat ei (4:13).

E prome biaha ku e tabata enkarselá na Roma (A.D. 60-62), Pablo tabatin bastante libertat. E por a biba na su mes kas i a risibí bishita ku regularidat. E biaha aki, e tabata será den prizon (2:9)—sinkumstansianan muchu ménos komfortabel.

Pablo tabata un persona ku konstant tabatin kontakto ku hende. Ma awor hopi di Pablo su kompañeronan, amigunan i koleganan tabata ousente. Algun kompañero fiel den ministerio tabata sirbi Señor otro kamina: “*Kresente a bai Galasia, Tito a bai Dalmasia*” (4:10) i Pablo a manda Tikiko na Efeso (4:12). Ma otronan a bandoná Pablo pa malu: “*...tur esnan ku ta na Asia a bira bai for di mi, entre otro Figelo i Hermógenes*” (1:15) i tambe “*Demas, kende a stima e mundu aktual aki, a bandonámi i a bai Tesalónika*” (4:10). Ta parse ku esaki tabata un sla duru pa Pablo.

Segun 4:16-17, Pablo ya kaba a duna su defensa. Nos no tin mas informashon tokante e prosedura legal òf kiko a sosodé, ma ta pars ku su kaso a wòrdu posponé. Na e okashon ei, ningun hende a apoy'é. E tabata so. Esaki tambe lo tabata un sla duru p'é. Talbes, tur hende tabatin miedu ku nan lo ta e siguiente víktima si nan ta presentá. Segun nos sa, e úniko persona ku tabata huntu ku Pablo tabata su kerido kolega, kompañero di biaha, dòktor Lukas (4:11). Den su karta, Pablo a pidi Timoteo pa bin serka dje, i pa trese Marko huntu kun'é (4:11). Den su karta, Pablo a ekspresá ku siguridat sigur ku e lo wòrdu ehekutá. Nos no sa si Timoteo a logra yega serka Pablo promé ku e ehekushon a tuma lugá.

II. SKIRBIMIENTU DI E BUKI

Nos a nota ku Emperador Nero a kuminsá persiguí kristiannan despues di akusá nan di okashoná e kandela ku a destruí gran parti di Roma na A.D. 64. Nos sa tambe ku Nero a kometé suisidio na luna di yüni di A.D. 68. Pues, e karta di 2 Timoteo mester a wòrdu skirbí entre e dos fechanan ei: A.D. 64-68. Kisas e fecha mas probabel ku Pablo a skirbi su karta lo ta durante promé parti di aña A.D. 67. Nos ta yega na e konklushon ei Pablo a pidi Timoteo pa bin serka dje promé ku wenter (4:21).

Pablo lo a skirbi e karta for di un prizon na Roma. Nos no sa presis unda Timoteo tabata tempu ku Pablo a skirbi e karta, ma nos sa ku e tabata na Efeso tempu ku Pablo a skirbi 1 Timoteo. No tin motibu pa pensa ku Timoteo a muda for di e stat ei. Pues e lo tabata na stat di Efeso ainda.

Despues ku Pablo a skirbi e karta aki, e karta a haña e nòmber griegu “PROS TIMOTHEON B”, den otro palabra “e Segundo pa Timoteo”. Ta parse ku ora Pablo su kartanan

a wòrdù kolektá, nan a agregá “B” pa distinguí e karta aki for di Pablo su promé karta pa Timoteo.

III. PROPOSITO DI E BUKI

E karta di 2 Timoteo ta kontené un variedat di perspektiva i emoshon. Klaramente e ta un karta personal ma tambe ta inkluí pólisa atrministrativo. Den e karta, Pablo ta kòrda pasado i tambe ta duna instrukshon pa ku futuro. Esaki ta un karta tristu ma tambe triunfante i yen di konfiansa.

Kiko ta motibunan ku Pablo a skirbi e karta aki pa Timoteo?

A. Pablo a skirbi Timoteo pa enkurash’è pa bin pronto serka dje (promé ku wenter) na Roma (4:21). Pablo a pidi Timoteo pa trese Marko huntu kun’è (4:11) i pa trese Pablo su mantel, bukinan, i pèrkamèntnan (4:13). E “pèrkamèntnan” probabelmente tabata e Skrituranan (Tèstamènt Bieu). Ta pesei e tabata ke e pèrkamèntnan “*spesialmente*”.

B. Pablo a skirbi Timoteo pa enkurash’è personalmente pa ta fiel den e ministerio i pa kontinuá ku e ministerio. Pablo tabata e generashon mas grandi, i e tabata laga Timoteo sa ku e ta esun responsabel awor komo e generashon mas hóben. Pablo a rekordá Timoteo ku Dios “*a salba nos i a yama nos ku un yamada santu...*” (1:9). Ta komo sifuera Pablo a komuniká ku Timoteo ku e tabata fiel na e yamada ei, i ku awor ta Timoteo su turno!

Pablo a reta Timoteo pa ta fiel pa ku su responsabilidatnan (1:6), pa tene duru na doktrina sano (1:13-14), pa evitá doktrina falsu (2:15-18), pa aseptá persekushon pa motibu di e evangelio (2:3-4; 3:10-12) i pa konfia Skritura i no pone paro na predikamentu di Palabra di Dios (3:15 – 4:5).

Pablo ta enkargá Timoteo ku su (Pablo) ministerio, e ministerio ku e mester buta un banda awor pasobra morto tabata ward’è.

Ta notabel ku Pablo tabata será den prizon komo un kriminal tempu ku el a skirbi e karta aki. Nos no ta pensa ku un prisionero lo skirbi un karta di enkurashamentu for di prizon. Ma Pablo a buska interes di otronan i tabata sa ku Timoteo tabatin mester palabranan di su tata spiritual ku lo enkurash’è.

C. Pablo a skirbi Timoteo pa inform’è di su situashon pendiente (4:6-18).

D. Pablo a skirbi Timoteo pa prepar’è pa problema ku hende pafó di iglesia lo inisiá (persekushon) i problemanan paden iglesia. Ta parse ku iglesia mester a bringa kontra hudaismo ku tabata frustrá ku kristianismo i tambe kontra paganismo korúpto i dekaí.

E. Den un sintido, 2 Timoteo ta Pablo su tèstamènt. E karta ta trata ku su pasado, presente, i futuro. Tambe e karta ta mostra kon e kreyentenan por enfrentá morto ku viktoria.

IV. STRUKTURA DI E BUKI

Pasobra e karta aki ta asina personal, Pablo no a preokupá pa organisá e buki bon manera el a hasi ku bukinan doktrinal (manera Romanonan). Ma di otro banda, e buki no ta djis algun idea bentá huntu na un forma desorganisá.

Struktura di 2 Timoteo segun John MacArthur:

- I. SALUDO I GRADISIMентU – 1:1-5
- II. E PERSEVERANSIA DI E HÒMBER DI DIOS – 1:6-18
 - A. E Retu – 1:6-11
 - B. E Ehèmpel – 1:12-18
- III. E PATRONCHI DI E HÒMBER DI DIOS – 2:1-26
 - A. Pablo – 2:1-2

- B. Un Sòldá – 2:3-4
- C. Un Atleta – 2:5
- D. Un Kunukero – 2:6-7
- E. Jesus – 2:8-13
- F. Un Trahadó – 2:14-19
- G. Un Artíkulo – 2:20-23
- H. Un Sirbidó – 2:24-26
- IV. E PELIGER PA KU E HÒMBER DI DIOS – 3:1-17
 - A. Enfrentando Apostasia – 3:1-9
 - B. Derotando Apostasia – 3:10-17
- V. E PREDIKAMENTU DI E HÒMBER DI DIOS – 4:1-5
 - A. E Retu pa Prediká – 4:1-2
 - B. E Nesesidat pa Prediká – 4:3-5
- VI. REMARKENAN FINAL – 4:6-18
 - A. Pablo Su Triúnfo – 4:6-8
 - B. Pablo Su Nesesidatnan – 4:9-18
- VII. PABLO SU DEPIDIDA – 4:19-22

Un otro skema di 2 Timoteo, for di punto di bista di Robert Gromacki:

- KUMINDAMENTU - 1:1-2
- I. SEA FIEL NA DIOS I NA PABLO - 1:3-18
- II. SEA FIEL NA BO MES - 2:1-26
 - A. Pa ku Bo Bida Personal - 2:1-26
 - B. Pa ku Bo Bida Públiko - 2:14-26
- III. SEA FIEL NA E MINISTERIO - 3:1-4:15
 - A. Motibunan pa e Ministerio - 3:1-13
 - B. Responsabilidatnan di e Pastor - 3:14-4:15 (tambe 3:5-13)
 1. Alehá for di siñadónan falsu - 3:5-9
 2. Sea prepará pa sufri - 3:10-13
 3. Kontinuá den e Palabra - 3:14-17
 4. Prediká e Palabra - 4:1-4
 5. Kompletá bo ministerio - 4:5-8
 6. Bin serka mi - 4:9-15
- IV. SEÑOR TA FIEL NA PABLO - 4:16-18
- KONKLUSHON - 4:19-22

Un otro perspektiva interesante ta ku foko di kapitulonnan 1-2 ta riba perseveransia durante pruebanan presente. Foko di kapitulonnan 3-4 ta riba pruebanan ku e hòMBER di Dios lo mester suportá den futuro.

V. OPSERVASHONAN DI E BUKI

A. E buki di 2 Timoteo ta un karta di tristesa i triúnfo. Laga nos mira tur dos banda: Pablo a skirbi ku un kurason kibrá, “*Demas...a bandonámi...*” (4:10), “*Alejandro...a tratami hopi malu...*” (4:14), i “*...tur a bandonámi...*” (4:16). Ma tambe Pablo a skirbi kla di su morto pendiente: “*ami ta wòrdu bashá kaba komo un ofrende di bibida*” (4:6). Den e kartanan ku el a skirbi ora e tabata enkarselá e promé biaha, e tabata sigur ku e lo haña su libertat

(Filipensenan 1:19,25-26; 2:24; Filemon 22). Ma e biaha aki, e ta sigur ku e spada di ehekushon ta ward'é.

Ma di otro banda, e ta un karta ti triúnfo, gloria, gratitut: “*den futuro ta warda pa mi e korona di hustisia*” (4:8)! El a skirbi ku konfiansa den Kristu, “...*mi sa den Ken mi a kere i mi ta konvensí ku E ta kapas pa warda loke mi a konfia na djE te na e dia ei*” (1:12).

B. Den e karta, kontemplando su morto pendiente, Pablo ta evaluá su mes ministerio den 4:6-8: “*Pasobra ami ta wòrdu bashá kaba komo un ofrende di bibida, i mi tempu di bai a yega. Mi a lucha e bon lucha, mi a tèminá e kareda, mi a warda e fe; den futuro ta wardá pa mi e korona di hustisia, kual Señor, e Hues hustu, lo dunami riba e dia ei; i no na ami so, ma tambe na tur esnan ku ta stima Su binida.*” Pablo ya kaba a entregá su kurpa pa biba pa Kristu (Romanonan 12:1) i awor e ta despuesto pa entregá su kurpa pa muri p’E (4:6). E tabata anticipá ku e lo ta huntu ku Kristu (Filipensenan 1:23).

C. Den kapitulo 2 Pablo a hasi uso di diferente metafora pa deskribí e kreyente: yu (2:1), dosente (implikashon, 2:2), sòldá (2:3), atleta (2:5), kunukero (2:6), sufridó (implikashon, 2:9-13), alumno òf trahadó eksperto (implikashon, 2:15), instrumènt pa onor (2:20-21), i sirbidó (2:24).

D. Tin dos deklarashon klásiko den Tèstament Nobo tokante e origen i propósito di Skritura (2 Pedro 1:20-21 i 2 Timoteo 3:16). Ma 2 Timoteo 3:16 ta esun ku ta destaká i ta mihó konosí. Segun e teksto griegu, tur Skritura ta θεοπνευστος “*rosea di Dios*”. Esei no ke men ku Dios a papia i Beibel a aparesé (manera a sosodé ku kreashon den Génesis 1). E ta nifiká ku e palbranan den Skritura, maske nan ta skirbí pa hende, ta e palabranan di Dios mes. E palabranan aki ta bèrdad, sin eror, i ta outoridat supremo. Su palabranan ta bibu i ta produsí kuater resultado: nan ta instruí, reprene, korigí, i ta eduká den hustisia.

E. Pablo ta usa e palabranan “den Cristo Jesus’ shete biaha (1:1,9,13; 2:1,10; 3:12,15) den e buki kortiku.

F. E karta kòrtiku aki ta menta nòmber di 23 persona. Algun di e nòmbernan no ta aparsé mas biaha den Skritura, i komo resultado, nos no sa nada mas tokante di nan fuera di loke ta skirbí di nan den 2 Timoteo.

G. Pablo a avisá Timoteo ku tempunan difisil ta na kaminda den 3:1-9,13. Sin duda lo no tabata fásil pa Pablo skirbi esei na su “yu” stimá. Ma e no a hala tras di lag’é sa ku no ta fásil den ministerio mishonero.

Literatura Konsultá

- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 171-172.
- Gromacki, Robert G. *New Testament Survey* (Grand Rapids, Michigan: Backer Book House, 1981), p. 302-305.
- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 310-311.
- Jensen, Irvin, L. *Jensen's Survey of the New Testament* (Chicago: Moody Press, 1981), p. 392-400.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 275-281.
- Mears, Henrietta C. *What the Bible is All About* (Minneapolis: World Wide Publications, 1966), p. 563-571.
- Poehnell, Gray. *New Testament Survey* notulonon (Prairie Bible Institute: Three Hills, Alberta, Canada, 1983).
- Tenny, Merrill C. *New Testament Survey* (Grand Rapids, Michigan: Wm. B. Eerdmans Publishing Co., 1980), p. 338-342.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publisher, 2002), p. 432-436.